

दिनांक 20.07.2024  
समय: 18.45 बजे

आकाशवाणी जयपुर—अजमेर

प्रादेशिक समाचार

- केन्द्र सरकार सोमवार ऊं सरू व्हे रह्या संसद रा बजट सत्र ऊं पैला काले सर्वदलीय बैठक बुलाई ।
- मुख्यमंत्री भजन लाल शर्मा पंचायतां रा विकास सारू सरपंचां ऊं दृढ इच्छा शक्ति रे साथै काम करण री अरज करी ।
- राष्ट्रीय परीक्षा एजेन्सी— एन टी ए मेडिकल प्रवेश परीक्षा नीट—यूजी रा केन्द्रवार नतीजा आप री वेबसाइट माथे अपलोड कर्या ।

अर

- प्रदेश मांय आज ई केई ठौडां चोखी बिरखा व्ही—मौसम महकमो अगूणी राजस्थान मांय काले ऊं तीन दिनां तांई बिरखा री गतिविधियां मांय बढवार री आस जतायी ।

000

केन्द्र सरकार सोमवार ऊं सरू व्हे रह्या संसद रा बजट सत्र ऊं पैला काले सगळा राजनैतिक दलां री मीटिंग बुलाई है । मीटिंग मांय सरकार दोन्यू सदनां रा सुचारू संचालन सारू सगळा विपख रा दलां ऊं मदद री अरज करेला । बजट सत्र आवता मीना री 12 तारीख तांई चालेला । वित्तमंत्री निर्मला सीतारमण 23 जुलाई ने लोकसभा मांय आम बजट पेश करेला । नरेंद्र मोदी सरकार रा तीजा कार्यकाल रो ओ पैलो बजट व्हेला ।

000

मुख्यमंत्री भजन लाल शर्मा पंचायतां रा विकास सारू सरपंचां ऊं दृढ इच्छा शक्ति रे साथे काम करण री अरज करी है । आज जयपुर मांय सरपंच सम्मान जळसा मांय गांवांई जन नुमाइन्दा सामी बोलता श्री शर्मा कह्यो के गांवां रा विकास ऊं ई देश रो विकास व्हे सके है । वणा कह्यो के ग्राम पंचायता आप री आमद रा साधन बधावण माथे ई काम करे ।

मुख्यमंत्री भजनलाल शर्मा आज जयपुर री हिंगोनिया गौशाला मांय व्ह्या एक कार्यक्रम मांय पौधारोपण कर ने **'एक पेड़ गौमाता के नाम'** अभियान री शुरुआत करी। कार्यक्रम मांय बोलता मुख्यमंत्री कह्यो के पर्यावरण अर प्रकृति री हिफाजत करणो आपा री संस्कृति री है। वणा कह्यो के **पेड़ां ने कटणा, नदियां ने सूखावणो अर पहाड़ां रे कम होवणो पर्यावरण सारू घणो घातक है। वणा कह्यो के पर्यावरण सारू सगळां ने पेड़ लगा र वां ने पालण अर वां ने बचावण री जिम्मेदारी ई लेवणी चाहिजे। वणा कह्यो के 7 अगस्त ने हरियाळी तीज माथे एक दिन मांय प्रदेश मांय 1 करोड़ पौधां लगाया जायेला। मुख्यमंत्री नौजवानां ऊं अरज करी के वे दूजा कामां रे साथे समाज, प्रदेश अर देश रे प्रति ई आप रा दायित्व निभावण रो काम करे। वणा कह्यो के किणी देश री पहचान विचार ऊं बणे है।**

जळसा मांय गोपालन अर पशुपालन मंत्री जोराराम कुमावत, मंत्री जवाहर सिंह बेढम, ग्रेटर निगम महापौर अर सौम्या गुर्जर समेत केई महकमां रा अहलकार, कर्मचारी अर पढेसर मौजूद रह्या।

प्रदेश री दूजी ठौड़ां माथे ई आज पौध रोपण रा कार्यक्रम व्ह्या। एक पेड़ मां के नाम अभियान रे तैत जयपुर मांय सप्त शक्ति कमान रा **कमाण्डर लेफिटनेन्ट जनरल मनजिन्दर सिंह** पौधा रोपण कर्यो। जालौर रा पूजाजी गेनाजी स्टेडियम मांय स्वायत्त शासन महकमां कानी ऊं मुख्यमंत्री वृक्षारोपण महाअभियान रे तैत **"वृक्ष मेरा परिवार, एक पेड़ माँ के नाम"** थीम माथे 300 पौधा लगा र पर्यावरण संरक्षण रो संदेश दीरीज्यो। कोटपूतली-बहरोड जिला रा बानसूर मांय वृक्षारोपण जागरूकता अभियान रे तैत अजै ताई डेढ़ लाख पौधा लगाया जा चुक्या है।

राज्य सरकार सांचौर जिला मांय फर्जी आधार कार्ड मामला री सीबीआई जांच सारू केन्द्र ने कागद लिख्यो है। साथे इ ई-मित्र संचालकां री जांच सारू सरकार प्रदेश भर मांय स्पेशन ऑपरेशन ई चलावेला। विधानसभा मांय ध्यानाकर्षण प्रस्ताव रे दौरान संसदीय कार्य मंत्री जोगाराम पटेल आ जाणकारी दी। श्री पटेल कह्यो की फर्जी आधार कार्ड मामलां री जांच सीबीआई ऊं करावण री सिफारिश केन्द्र सरकार ने भेज दीरीजी है। वणा बतायो की मामलां री जांच चाल री है अर दोषियां रे खिलाफ करडी कार्यवाही व्हेला। वणा कह्यो के भविष्य मांय ऐडो नी व्हे इण सारू सरकार हर जरूरी कदम उठावेला। श्री पटेल कह्यो के प्रदेश भर मांय आधार कार्ड बणावण वाळां ई-मित्रां री जांच व्हेला। इण माथे दखल करता विधानसभा अध्यक्ष वासुदेव देवनानी कह्यो के ओ घणो गंभीर मुद्दो है। राष्ट्रीय सुरक्षा ऊं जुड्यो है। वणा कह्यो के ई-मित्र संचालक जो फर्जी आधार कार्ड बणा रह्या है वां रे खिलाफ करडी कार्रवाई करी जायेला।

प्रदेश रा उपमुख्यमंत्री अर उच्च शिक्षा मंत्री डॉ प्रेमचंद बैरवा कह्यो है के राज्य रा नौजवानां ने जिला थर माथे विदेशी भाषावां री सिखावण दी जायेला। श्री बैरवा आज सिंज्या विधानसभा मांय उच्च शिक्षा री अनुदान मांगां माथे व्ही बहस रो जवाब दे रिया हा। वणा कह्यो के जिला थर माथे फ्रेंच जर्मन जापानी समेत दूजी भाषावां नौजवानां

ने सिखायी जावेला। वणा कह्यो के वां री सरकार उच्च शिक्षा मांय गणुवत्ता वाळी सिखावण माथे जोर दे री है।

उच्च शिक्षा मंत्री कह्यो के वणा सगळा अहलकारां ने कॉलेज रो निरीक्षण कर ने वां री समस्या देख ने निपटारो करण रा निर्देश दिया है। इण ऊं पैला विधानसभा मांय उच्च शिक्षा माथे व्ही चर्चा मांय हिस्सो देवता विधायकां उच्च शिक्षा री न्यारी-न्यारी समस्यावां सदन मांय राख्या साथै ई आप रा हलकां मांय चाल रह्या कॉलेज री समस्या रा बारा मांय ई मंत्री रो ध्यान दीरायो।

000

राष्ट्रीय परीक्षा एजेन्सी-एन टी ए मेडिकल प्रवेश परीक्षा नीट-यूजी रो केन्द्रवार नतीजा आप री वेबसाइट माथे अपलोड कर दिया है। एन टी ए सर्वोच्च न्यायालय रा हुकम रे पछे नतीजा वेबसाइट माथे दीरीज्या है। इण ऊं पैला न्यायालय एन.टी.ए. ने उम्मीदवारां री पिछाण उजागर कर्या बिना आज दोपारा 12 बज्यां ताई वेबसाइट माथे शहरवार अर केन्द्रवार नतीजा ऐलाण करण रा हुकम दिया हा। नतीजा अबे वेबसाइट दममजण्डजंवदसपदमण्पद माथे मौजूद है।

000

भरतपुर जिला री परेरा ग्राम पंचायत रा सोनेरा गांव मांय आज खेती महकमां कानी ऊं महिला कृषक प्रशिक्षण शिविर लगायी ज्यो। शिविर मांय कोई 30 महिलावां हिस्सो लियो। ई दौरान महिलावां ने खेती रा बारा मांय जाणकारी देवण रे साथै ई काश्तकारां सारू सरकार री योजनावां रा बारा मांय बतायी ज्यो। सिखावण मांय भेळी महिला काश्तकारां रे फसला मांय लागण वाळा रोग री पिछाण अर इण सारू दवायां रा बारा मांय ई जाणकारी दीरीजी।

000

बूंदी जिला मांय एक सड़क हादसा मांय एक महिला री मौत व्हे गयी। राष्ट्रीय राजमार्ग 148 डी माथे महाराजपुरा कने ट्रक अर कार री टक्कर ऊं ओ हादसो व्ह्यो। हादसा मांय तीन लोग घायल व्हे ग्या हा। आ मांय ऊं एक महिला री मौत हो गई। दो घायलां ने नैनवां मांय प्राथमिक उपचार रे पछे कोटा रैफर कर दीरीज्या है।

000

प्रदेश मांय आज ई केई ठौड़ां चोखी बिरखा व्ही है। श्रीगंगानगर मांय लारला केई दिनां ऊं बिरखा व्हे री है। जिला मुख्यालय ने छोड र आरे-सारे आज ई पाणी बरस्यो। सूरतगढ हलका मांय चोखी बिरखा व्ही। तेज हवा रे साथै व्ही बिरखा ऊं लोगां ने गर्मी ऊं आराम मिल्यो है। भीलवाडा मांय अचाणचक घणा बादळ छायाीजण ऊं दिन मांय अंधारो व्हे ग्यो। ई दौरान हल्की बिरखा व्ही। जिला रा माण्डलगढ मांय मूसलाधार बिरखा व्ही। पाली मांय केई दिनां री उमस रे पछे आज पाणी बरस्यो। केई ठौड़ां पाणी भरीजण ऊं आवण जावण रा रस्ता रूकी ज्या। टोंक मांय दोपारा ताई करडी उमस री। इण रे पछे अचाणचक बादळ छायाी ज्या अर बूदाबांदी सरू व्ही। बूंदी अर बीकानेर मांय ई दोपारा बिरखा व्ही। मौसम महकमो कह्यो है के अगुणी राजस्थान मांय काले ऊं 3 दिनां ताई बिरखा री गतिविधियां मांय बढवार व्हेला। ई दौरान कोटा, उदयपुर, जयपुर, अजमेर अर भरतपुर संभाग मांय कठेई कठेई भारी बिरखा अर एक दो ठौड़ां माथे घणी भारी बिरखा होवण री आस है। महकमो आज आज चित्तौडगढ, झालावाड, भीलवाडा अर जैसलमेर जिला रा कुछ ठौड़ां माथे मझला ऊं तेज बिरखा रो ऑरेंज अलर्ट जारी कर्यो है।

000

प्रधानमंत्री नरेंद्र मोदी 28 जुलाई ने आकाशवाणी ऊं प्रसारित करया जावण वाळा खास कार्यक्रम 'मन की बात' मांय विचार बतावेला। आ हर महीना प्रसारित कर्या जावण वाळा ई कार्यक्रम री 112 वीं कड़ी व्हेला। ई कार्यक्रम सारू आप ई विचार अर राय मुफ्त नम्बर 1800-11-7800 रे मार्फत दे सको हो।

000

जयपुर ग्रेटर नगर निगम कानी ऊं 'स्वच्छता अपनाओ, बीमारी भगाओ' अभियान रे तैत नुक्कड़ नाटक अर रैली री मार्फत आज लोगां ने स्वच्छता रो संदेश दीरीज्यो। ई अभियान मांय जयपुर री एक निजी स्कूल रा पढेसरां अर स्टाफ स्वच्छता माथे नुक्कड़ नाटक प्रस्तुत कर्यो अर स्वच्छता रैली निकाली।

000

जयपुर रा जवाहर कला केंद्र मांय 23 ऊं 28 जुलाई तांई छः दिन रो नटराज महोत्सव व्हेला। जवाहर कला केन्द्र री सहभागिता मांय निजी संस्थानां रा संयोजन ऊं होवण वाळां महोत्सव मांय रंगमंच, गायन अर नाच रो संयोजन देखण ने मिलेला।

000